



Broj: 02-04-6476-2/25
Sarajevo, 27.02.2025. godine

Na osnovu člana 26. i 28. stav (4) Zakona o Vladi Kantona Sarajevo („Službene novine Kantona Sarajevo“, broj: 36/14 - Novi prečišćeni tekst i 37/14 - Ispravka) Vlada Kantona Sarajevo, na **65.** sjednici održanoj **27.02.2025.** godine, donijela je

ZAKLJUČAK

1. Utvrđuje se nacrt Zakona o upravljanju privrednim društvima u kojima je Kanton Sarajevo član društva.
2. Nacrt Zakona iz tačke 1. ovog zaključka dostavlja se Skupštini Kantona Sarajevo na nadležno odlučivanje.
3. Ovaj zaključak stupa na snagu danom donošenja.

PREMIJER

Nihad Uk

Dostaviti:

1. Predsjedavajući Skupštine Kantona Sarajevo,
2. Skupština Kantona Sarajevo,
3. Zamjenici predsjedavajućeg Skupštine Kantona Sarajevo (3x),
4. Premijer Kantona Sarajevo,
5. Ministarstvo privrede Kantona Sarajevo,
6. Evidencija,
7. A r h i v a.



Broj: _____
Sarajevo, _____ 2025. godine

Na osnovu člana 140. Poslovnika Skupštine Kantona Sarajevo ("Službene novine Kantona Sarajevo", br. 41/12 - Drugi prečišćeni tekst, 15/13, 47/13, 47/15, 48/16, 9/20, 14/20 i 16/22) Skupština Kantona Sarajevo, na sjednici održanoj dana __.__.2025. godine, donijela je slijedeći

ZAKLJUČAK

1. Utvrđuje se Nacrt Zakona o upravljanju privrednim društvima u kojima je Kanton Sarajevo član društva.
2. Nacrt Zakona iz tačke 1. ovog zaključka stavlja se na javnu raspravu.
3. Učesnici u javnoj raspravi su kantonalni organi uprave, jedinice lokalne samouprave, naučne i stručne ustanove, a trajat će 30 dana.
4. Primjedbe, prijedlozi, sugestije i mišljenja učesnici javne rasprave dostavljaju Vladi Kantona Sarajevo, putem Ministarstva privrede Kantona Sarajevo, koje organizuje i provodi javnu raspravu.
5. Vlada Kantona Sarajevo dužna je nakon provedene javne rasprave, Skupštini Kantona Sarajevo dostaviti prijedlog Zakona o upravljanju privrednim društvima u kojima je Kanton Sarajevo član društva, vodeći računa o primjedbama, prijedlozima, sugestijama i mišljenjima kroz izvještaj o provedenoj javnoj raspravi.
6. Ovaj zaključak stupa na snagu danom donošenja.

**PREDSJEDAVAJUĆI
SKUPŠTINE KANTONA SARAJEVO**

Elvedin Okerić

Na osnovu člana 18. stav 1. tačka b) Ustava Kantona Sarajevo („Službene novine Kantona Sarajevo“, br. 1/96, 2/96-Ispravka, 3/96-Ispravka, 16/97, 14/00, 4/01, 28/04, 6/13 i 31/17), Skupština Kantona Sarajevo na sjednici od _____ 2025. godine, donijela je

Nacrt

ZAKON O UPRAVLJANJU PRIVREDNIM DRUŠTVIMA U KOJIMA JE KANTON SARAJEVO ČLAN DRUŠTVA

POGLAVLJE I. OSNOVNE ODREDBE

Član 1. (Predmet)

Ovim zakonom uređuje se način upravljanja privrednim društvima u kojima je Kanton Sarajevo (u daljem tekstu: Kanton) član društva.

Član 2. (Značenje pojedinih izraza)

Pojedini izrazi upotrijebljeni u ovom zakonu imaju slijedeća značenja:

- a) **član društva** podrazumijeva da Kanton u osnovnom kapitalu društva sa ograničenom odgovornošću ima ulog koji mu daje pravo na udio u društvu odnosno da Kanton u osnovnom kapitalu dioničkog društva ima ulog koji mu daje pravo na dionicu;
- b) **punomoćnik** podrazumijeva punomoćnika u društvu sa ograničenom odgovornošću odnosno punomoćnika u dioničkom društvu, a u kojima je Kanton član društva;
- c) **punomoćnik u društvu sa ograničenom odgovornošću** podrazumijeva punomoćnika u društvu sa ograničenom odgovornošću u kojem je Kanton član društva, a kojeg imenuje, daje upute za postupanje i razrješava Vlada Kantona Sarajevo (u daljem tekstu: Vlada);
- d) **punomoćnik u dioničkom društvu** podrazumijeva punomoćnika u dioničkom društvu u kojem je Kanton član društva, a kojem punomoć i upute za postupanje daje Vlada;
- e) **resorno ministarstvo** podrazumijeva ono ministarstvo čiji se poslovi iz djelokruga utvrđenog Zakonom o ministarstvima i drugim organima uprave Kantona Sarajevo („Službene novine Kantona Sarajevo“, broj 40/22) mogu dovesti u vezu sa osnovnom djelatnosti privrednog društva iz stava (1) ovog člana.

Član 3. (Gramatička terminologija)

Gramatička terminologija korištenja muškog ili ženskog spola podrazumijeva uključivanje oba roda.

Član 4. (Evidencija privrednih društava)

- (1) U svrhu evidencije privrednih društava iz člana 1. ovog zakona, Vlada će donijeti Odluku o listi privrednih društava u kojima je Kanton član društva.
- (2) Vlada će na prijedlog Ministarstva pravde i uprave Kantona Sarajevo u roku od 60 dana od dana stupanja na snagu ovog zakona donijeti odluku iz stava (1) ovog člana.
- (3) Ministarstvo pravde i uprave Kantona Sarajevo prijedlog odluke iz stava (1) ovog člana pripremit će uz prethodno obavljene konsultacije sa resornim ministarstvima.
- (4) Odluka iz stava (1) ovog člana sadrži listu privrednih društava podijeljenu po resornim ministarstvima.

- (5) Resorna ministarstva dužna su, u slučaju potrebe za izmjenom i/ili dopunom odluke iz stava (1) ovog člana, da upute inicijativu Ministarstvu pravde i uprave Kantona Sarajevo da Ministarstvo pravde i uprave Kantona Sarajevo pripremi i dostavi Vladi prijedlog odluke o izmjeni i/ili dopuni odluke iz stava (1) ovog člana.

POGLAVLJE II. UPRAVLJANJE PRIVREDNIM DRUŠTVIMA

Član 5.

(Učešće u radu i odlučivanju skupštine privrednog društva)

- (1) Učešće u radu i odlučivanju skupštine privrednog društva iz člana 1. ovog zakona Kanton ostvaruje putem punomoćnika.
- (2) Punomoćnik iz stava (1) ovog člana može biti samo fizičko lice.

Član 6.

(Ovlaštenja Vlade Kantona)

Vlada ima ovlaštenje da:

- a) vrši imenovanje, daje upute za postupanje i razrješava punomoćnika u društvu sa ograničenom odgovornošću,
- b) daje punomoć i upute za postupanje punomoćniku u dioničkom društvu.

Član 7.

(Imenovanje punomoćnika u društvu sa ograničenom odgovornošću)

- (1) Vlada vrši imenovanje punomoćnika u društvu sa ograničenom odgovornošću na prijedlog resornog ministarstva.
- (2) Prilikom imenovanja punomoćnika iz stava (1) ovog člana isti mora da ispunjava uslove iz člana 8. ovog zakona, a ispunjenost uslova procjenjuje se na osnovu odgovarajuće pravno mjerodavne dokumentacije.
- (3) Pod pravnom mjerodavnom dokumentacijom iz stava (2) ovog člana podrazumijevaju se uvjerenja, potvrde i druge isprave izdate od nadležnih organa, kao i izjave date i ovjerene pred nadležnim organom u skladu sa zakonom.

Član 8.

(Uslovi za imenovanje punomoćnika u društvu sa ograničenom odgovornošću)

- (1) Punomoćnik u društvu sa ograničenom odgovornošću mora da ispunjava opće uslove:
- a) da je državljanin Bosne i Hercegovine,
- b) da je stariji od 18 godina,
- c) da nije osuđivan za krivično djelo i da se protiv njega ne vodi krivični postupak,
- d) da nije otpušten iz državne službe kao rezultat disciplinske mjere na bilo kojem nivou vlasti u Bosni i Hercegovini,
- e) da se na tog kandidata ne odnosi član IX. 1. Ustava Bosne i Hercegovine,
- f) da nije u sukobu interesa u smislu Zakona o prevenciji i suzbijanju korupcije u Kantonu Sarajevo ("Službene novine Kantona Sarajevo", br. 35/22, 44/22-Ispravka i 52/22-Ispravka).
- (2) Pored općih uslova iz stava (1) ovog člana, punomoćnik iz stava (1) ovog člana mora da ispunjava i posebne uslove:
- a) da ima visoku stručnu spremu VII stepena, odnosno visoko obrazovanje prvog ili drugog ili trećeg ciklusa Bolonjskog sistema studiranja,
- b) da ima višegodišnje iskustvo u radu,
- c) da posjeduje znanja i sposobnosti razumijevanja poslovnih izvještaja i poznavanje propisa koji se primjenjuju na rad i poslovanje privrednih društava,
- d) da posjeduje sposobnost za savjesno i odgovorno obavljanje povjerene funkcije,
- e) da ima pozitivne rezultate rada ostvarene tokom karijere,

- f) da nema privatni finansijski interes u privrednom društvu u koje se imenuje,
- g) da nije član uprave ili nadzornog odbora ili odbora za reviziju u privrednom društvu u koje se imenuje.

Član 9.

(Upute za postupanje punomoćniku u društvu sa ograničenom odgovornošću)

- (1) U društvu sa ograničenom odgovornošću u kojem se kao član društva pojavljuje Kanton, organi odnosno lica koja su u skladu sa odredbama Zakona o privrednim društvima ("Službene novine Federacije Bosne i Hercegovine", br. 81/15 i 75/21) ovlaštena da sazovu skupštinu tog društva, dužna su da poziv za sjednicu skupštine društva sa predloženim dnevnim redom i pratećim materijalima dostave imenovanom punomoćniku iz člana 7. ovog zakona.
- (2) Punomoćnik iz stava (1) ovog člana dužan je da poziv za sjednicu skupštine društva sa predloženim dnevnim redom i pratećim materijalima iz stava (1) ovog člana dostavi resornom ministarstvu.
- (3) Vlada, na prijedlog resornog ministarstva, daje punomoćniku iz stava (2) ovog člana upute za postupanje na sjednici skupštine društva iz stava (1) ovog člana u slijedećim slučajevima:
 - a) prilikom odlučivanja o povećanju ili smanjenju osnovnog kapitala,
 - b) prilikom usvajanja godišnjeg izvještaja o poslovanju društva koji uključuje finansijski izvještaj i izvještaje revizora, nadzornog odbora i odbora za reviziju,
 - c) pri kupovini, prodaji, zamjeni, uzimanju ili davanju u lizing, uzimanju ili davanju kredita i drugim transakcijama imovinom,
 - d) prilikom izbora i razrješenja članova nadzornog odbora,
 - e) prilikom izbora i razrješenja članova odbora za reviziju,
 - f) prilikom odlučivanja o statutu društva,
 - g) prilikom odlučivanju o planu poslovanja društva.
- (4) Izuzetno, Vlada može i u drugim slučajevima koji nisu obuhvaćeni stavom (3) ovog člana, na prijedlog resornog ministarstva, dati punomoćniku iz stava (2) ovog člana upute za postupanje na sjednici skupštine društva iz stava (1) ovog člana.
- (5) Punomoćnik iz stava (1) ovog člana dužan je postupiti u skladu sa uputama Vlade, a ako uputu nije dobio najkasnije do početka sjednice skupštine društva iz stava (1) ovog člana dužan je postupati u skladu sa razumnom prosudbom najboljeg interesa Kantona.

Član 10.

(Razrješenje punomoćnika u društvu sa ograničenom odgovornošću)

- (1) Vlada može u svako doba razriješiti punomoćnika u društvu sa ograničenom odgovornošću.
- (2) O svakom razrješenju punomoćnika iz stava (1) ovog člana Vlada je dužna blagovremeno obavijestiti privredno društvo iz člana 1. ovog zakona.

Član 11.

(Punomoć i upute za postupanje punomoćniku u dioničkom društvu)

U slučaju sazivanja skupštine dioničkog društva u kojem je Kanton dioničar, Vlada će, na prijedlog resornog ministarstva, dati punomoć i upute za postupanje punomoćniku u dioničkom društvu.

Član 12.

(Praćenje rada punomoćnika)

- (1) U svrhu praćenja postupanja punomoćnika u radu i odlučivanju skupštine privrednog društva iz člana 1. ovog zakona, društvo je dužno najkasnije u roku od tri dana od dana održavanja skupštine društva izvijestiti resorno ministarstvo o donesenim odlukama.
- (2) Resorno ministarstvo dužno je izvršiti procjenu odluka iz stava (1) ovog člana, te ukoliko utvrdi da su iste donesene suprotno uputama koje je Vlada dala punomoćniku za postupanje na sjednici skupštine društva ili da iste mogu biti na štetu interesa Kantona, predložiti će

Vladi da o tome odmah obavijesti privredno društvo sa zahtjevom da nadležni organ privrednog društva obustavi od izvršenja takvu odluku.

Član 13.

(Pobijanje valjanosti punomoći)

Ukoliko Vlada privrednom društvu iz člana 1. ovog zakona u periodu od sedam dana od dana održane skupštine društva dostavi akt kojim pobija valjanost punomoći na osnovu koje je punomoćnik učestvovao u radu i odlučivanju skupštine, nadležni organ tog društva će proglasiti nevažećim glasove na osnovu te punomoći i o tome pismeno izvijestiti sazivača skupštine.

Član 14.

(Naknada za rad punomoćnika)

Punomoćnik ima ovlaštenje da zaključi ugovor o mjesečnoj naknadi za rad koja pripada predsjedniku odnosno članu skupštine iz člana 10. stav (3) Zakona o plaćama i naknadama članova organa upravljanja i drugih organa institucija Kantona Sarajevo, kantonalnih javnih preduzeća i javnih ustanova čiji je osnivač Kanton Sarajevo ("Službene novine Kantona Sarajevo", broj 10/16), a naknada iz ugovora pripast će punomoćniku.

POGLAVLJE III. PRELAZNE I ZAVRŠNE ODREDBE

Član 15.

(Primjena drugih propisa)

Za sva pitanja koja nisu regulisana ovim zakonom primjenjuju se odredbe Zakona o javnim preduzećima u Federaciji Bosne i Hercegovine ("Službene novine Federacije Bosne i Hercegovine", br. 8/05, 81/08, 22/09 i 109/12) i Zakona o privrednim društvima ("Službene novine Federacije Bosne i Hercegovine", br. 81/15 i 75/21).

Član 16.

(Punomoćnici)

- (1) Punomoćnici imenovani na osnovu Odluke o vršenju ovlaštenja u privrednim društvima sa učešćem državnog kapitala iz nadležnosti Kantona Sarajevo ("Službene novine Kantona Sarajevo", broj 31/19) obavljat će poslove do imenovanja punomoćnika u skladu sa odredbama ovog zakona.
- (2) Imenovanje punomoćnika u skladu sa odredbama ovog zakona potrebno je izvršiti u roku od šest mjeseci od dana stupanja na snagu ovog zakona.

Član 17.

(Prelazne odredbe)

Privredna društva iz člana 1. ovog zakona su dužna uskladiti odredbe statuta i drugih općih akata sa ovim zakonom u roku od 60 dana od dana stupanja na snagu ovog zakona.

Član 18.

(Prestanak važenja Zakona o upravljanju privrednim društvima u nadležnosti Kantona Sarajevo)

Danom stupanja na snagu ovog zakona prestaje da važi Zakon o upravljanju privrednim društvima u nadležnosti Kantona Sarajevo ("Službene novine Kantona Sarajevo", broj 8/01).

Član 19.

(Prestanak važenja Odluke o vršenju ovlaštenja u privrednim društvima sa učešćem državnog kapitala iz nadležnosti Kantona Sarajevo)

Danom stupanja na snagu ovog zakona prestaje da važi Odluka o vršenju ovlaštenja u privrednim društvima sa učešćem državnog kapitala iz nadležnosti Kantona Sarajevo ("Službene novine Kantona Sarajevo", broj 31/19).

Član 20.

(Stupanje na snagu)

Ovaj zakon stupa na snagu osmog dana od dana objavljivanja u "Službenim novinama Kantona Sarajevo".

Broj _____
Sarajevo, _____ 2025. godine

PREDSJEDAVAJUĆI
SKUPŠTINE KANTONA SARAJEVO

Elvedin Okerić

O B R A Z L O Ž E N J E

I – PRAVNI OSNOV

Pravni osnov za donošenje ovog zakona sadržan je u odredbi člana 18. stav 1. tačka b) Ustava Kantona Sarajevo („Službene novine Kantona Sarajevo“, br. 1/96, 2/96, 3/96, 16/97, 14/00, 4/01, 28/04, 6/13 i 31/17).

II – RAZLOZI DONOŠENJA

Skupština Kantona Sarajevo donijela je 29.03.2001. godine Zakon o upravljanju privrednim društvima u nadležnosti Kantona Sarajevo („Službene novine Kantona Sarajevo“, broj 8/01).

Polazeći od činjenice da je od tada do danas proteklo više od 25 godina, a da je u međuvremenu federalni Zakon o privrednim društvima doživio veći broj izmjena i dopuna („Službene novine Federacije BiH“, br. 23/99, 45/00, 2/02, 6/02, 29/03, 68/05, 91/07, 84/08, 88/08, 7/09, 75/13) odnosno da je u konačnici Federacija donijela i novi Zakon o privrednim društvima („Službene novine Federacije BiH“, br. 81/15 i 75/21), ali i Zakon o javnim preduzećima u Federaciji BiH („Službene novine Federacije BiH“, br. 8/05, 81/08, 22/09 i 109/12), kao neizostavno se postavilo pitanje primjene Zakon o upravljanju privrednim društvima u nadležnosti Kantona Sarajevo („Službene novine Kantona Sarajevo“, broj 8/01) i njegove usaglašenosti sa propisima više pravne snage, to jest, sa Zakonom o privrednim društvima („Službene novine Federacije BiH“, br. 81/15 i 75/21) i Zakonom o javnim preduzećima u Federaciji BiH („Službene novine Federacije BiH“, br. 8/05, 81/08, 22/09 i 109/12).

Analizirajući odredbe Zakon o upravljanju privrednim društvima u nadležnosti Kantona Sarajevo utvrđeno je da su iste potpuno anahrone i gotovo u cijelosti u koliziji sa odredbama federalnog Zakona o privrednim društvima i Zakona o javnim preduzećima u FBiH.

S tim u vezi, a kako bi Kanton Sarajevo na adekvatan, jasan, precizan i funkcionalan način, a sve u skladu sa propisima više pravne snage i to federalnim Zakonom o privrednim društvima i Zakonom o javnim preduzećima u FBiH uredi pitanje upravljanja privrednim društvima u kojima Kanton ima ulog u kapitalu, pristupilo se izradi nacrtu novog zakona.

Također, s namjerom da se jednim propisom i to u formi zakona reguliše materija upravljanja privrednim društvima u kojima Kanton ima ulog u kapitalu, nacrtom novog zakona predviđeno je sa danom stupanja na snagu novog zakona i prestanak važenja Odluke o vršenju ovlaštenja u privrednim društvima sa učešćem državnog kapitala iz nadležnosti Kantona Sarajevo („Službene novine Kantona Sarajevo“, broj 31/19).

Dakle, uzimajući u obzir sve navedeno, pripremljen je nacrt novog zakona, odnosno nacrt Zakona o upravljanju privrednim društvima u kojima se kao član društva pojavljuje Kanton Sarajevo.

III – PRAVNA RJEŠENJA

Član 1. ovim članom određuje se šta je predmet Zakona.

Član 2. ovim članom određuje se značenje pojedinih izraza upotrebljenih u Zakonu.

Član 3. ovim članom određuje se da korištenja riječi muškog ili ženskog spola podrazumijeva uključivanje oba spola.

Član 4. ovim članom određuje se način evidencije privrednih društava na koja se primjenjuje ovaj zakon.

Član 5. ovim članom određuje se da učešće u radu i odlučivanju skupštine privrednog društva u kojima se Kanton Sarajevo pojavljuje kao član društva, Kanton ostvaruje putem punomoćnika.

Član 6. ovim članom određuje se da Vlada Kantona ima ovlaštenje da:

- a) vrši imenovanje, daje upute za postupanje i razrješava punomoćnika u društvu sa ograničenom odgovornošću,
- b) daje punomoć i upute za postupanje punomoćniku u dioničkom društvu.

Član 7. ovim članom propisuje se imenovanje punomoćnika u društvu sa ograničenom odgovornošću.

Član 8. ovim članom propisuju se uslovi za imenovanje punomoćnika u društvu sa ograničenom odgovornošću.

Član 9. ovim članom određuje se postupak i način davanja uputa punomoćniku u društvu sa ograničenom odgovornošću za postupanje.

Član 10. ovim članom određuje se način razrješavanja punomoćnika u društvu sa ograničenom odgovornošću.

Član 11. ovim članom određuje se način davanja punomoći i uputa za postupanje punomoćniku u dioničkom društvu.

Član 12. ovim članom propisuje se način praćenja rada punomoćnika.

Član 13. ovim članom određuje se način pobijanja valjanosti punomoći.

Član 14. ovim članom regulira se pitanje naknade za rad punomoćnika.

Član 15. ovim članom određuje se da za sva pitanja koja nisu regulisana ovim zakonom primjenjuju se odredbe Zakona o javnim preduzećima u Federaciji Bosne i Hercegovine ("Službene novine Federacije Bosne i Hercegovine", br. 8/05, 81/08, 22/09 i 109/12) odnosno Zakona o privrednim društvima ("Službene novine Federacije Bosne i Hercegovine", br. 81/15 i 75/21).

Član 16. ovim članom određuje se da punomoćnici imenovani na osnovu Odluke o vršenju ovlaštenja u privrednim društvima sa učešćem državnog kapitala iz nadležnosti Kantona Sarajevo ("Službene novine Kantona Sarajevo", broj 31/19) će obavljati poslove do imenovanja punomoćnika u skladu sa odredbama ovog zakona, a da je imenovanje punomoćnika u skladu sa odredbama ovog zakona potrebno izvršiti u roku od šest mjeseci od dana njegovog stupanja na snagu.

Član 17. ovim članom se određuje da su privredna društva iz člana 1. ovog zakona dužna uskladiti odredbe statuta i drugih općih akata sa ovim zakonom u roku od 60 dana od dana stupanja na snagu ovog zakona.

Član 18. ovim članom određuje se da danom stupanja na snagu ovog zakona prestaje da važi Zakon o upravljanju privrednim društvima u nadležnosti Kantona Sarajevo ("Službene novine Kantona Sarajevo", broj 8/01).

Član 19. ovim članom određuje se da danom stupanja na snagu ovog zakona prestaje da važi Odluka o vršenju ovlaštenja u privrednim društvima sa učešćem državnog kapitala iz nadležnosti Kantona Sarajevo ("Službene novine Kantona Sarajevo", broj 31/19).

Član 20. ovim članom određuje se da Zakon stupa na snagu osmog dana od dana objavljivanja u "Službenim novinama Kantona Sarajevo".

IV – FINANSIJSKA SREDSTVA


Za provođenje ovog zakona nisu potrebna dodatna finansijska sredstava u Budžetu Kantona Sarajevo. Sastavni dio ovog obrazloženja je obrazac IFP-NE.

Izvod iz Ustava Kantona Sarajevo („Službene novine Kantona Sarajevo“, br. 1/96, 2/96, 3/96, 16/97, 14/00, 4/01, 28/04, 6/13 i 31/17)

**Član 18.
Nadležnosti Skupštine**

Skupština Kantona:

- a) priprema i dvotrećinskom većinom usvaja Ustav Kantona;
- b) donosi zakone i druge propise u okviru izvršavanja nadležnosti Kantona, izuzev propisa koji su ovim Ustavom ili zakonom dati u nadležnost Vlade Kantona;
- d) utvrđuje politiku i donosi programe razvoja Kantona;
- e) potvrđuje Vladu Kantona;
- h) usvaja budžet Kantona i donosi zakone o oporezivanju i na drugi način osigurava potrebno finansiranje;
- i) bira zastupnike u Dom naroda Federacije sukladno Ustavu Federacije;
- j) odlučuje o prijenosu ovlaštenja Kantona na općinu, grad i Federaciju;
- k) odobrava zaključivanje ugovora i sporazuma u oblasti međunarodnih odnosa i međunarodne suradnje;
- l) provodi istragu sukladno ovom Ustavu i posebnim propisima;
- m) vrši i druge poslove utvrđene federalnim propisima, ovim Ustavom i kantonalnim propisima.



Broj: 09-02-2835/25
Sarajevo, 17.02.2025. godine

KANTON SARAJEVO
MINISTARSTVO PRIVREDE

PREDMET: Mišljenje na nacrt Zakona o upravljanju privrednim društvima u kojima je Kanton Sarajevo član društva.-

Na osnovu člana 3. stav (1) tačka b) Uredbe o osnivanju Ureda za zakonodavstvo Vlade Kantona Sarajevo ("Službene novine Kantona Sarajevo", broj 20/23) i člana 4. Uredbe o postupku i načinu pripremanja, izrade i dostavljanja propisa ("Službene novine Kantona Sarajevo", broj 50/17-Drugi novi prečišćeni tekst, 2/18-Ispravka i 32/22), Ured za zakonodavstvo Vlade Kantona Sarajevo, daje slijedeće

MIŠLJENJE

1. Presudom Ustavnog suda Federacije Bosne i Hercegovine, broj: U-18/15 od 03.11.2015. godine utvrđeno je da Uredba o vršenju ovlaštenja u privrednim društvima sa učešćem državnog kapitala iz nadležnosti Federacije Bosne i Hercegovine ("Službene novine Federacije BiH", broj: 44/15) u cjelosti nije u skladu sa Ustavom Federacije Bosne i Hercegovine. Navedenom presudom je, između ostalog, utvrđeno da je pitanje vršenja ovlaštenja u privrednim društvima sa učešćem državnog kapitala iz nadležnosti Federacije, u nadležnosti Parlamenta Federacije Bosne i Hercegovine kao zakonodavne vlasti Federacije, te da Vlada nije bila ovlaštena da, pozivajući se na član 3. stav 2. i na član 19. stav 1. Zakona o Vladi Federacije Bosne i Hercegovine, u vezi sa članom 31. Zakona o privatizaciji preduzeća u Federaciji Bosne i Hercegovine, donosi osporenu Uredbu kojom se, kao materija koja je u nadležnosti zakonodavne vlasti, uređuju pitanja vršenja ovlaštenja u privrednim društvima sa učešćem državnog kapitala iz nadležnosti Federacije.

U cilju osiguranja principa podjele vlasti i zakonitog vršenja izvršne i zakonodavne vlasti (unutar ustavom i zakonom datog okvira), a uvažavajući stavove Ustavnog suda navedene u pomenutoj presudi, kao i stav da se posebnim propisom mogu utvrditi i dodijeliti pojedinom organu ovlaštenja za ostvarivanje nadležnosti u određenoj oblasti, ne mogu se novim zakonom dodjeljivati već dodijeljena ovlaštenja za ostvarivanje nadležnosti u određenoj oblasti i ne mogu se derogirati nadležnosti organa zakonodavne vlasti.

Imajući u vidu činjenicu da Zakon o upravljanju državnim kapitalom u privrednim društvima u Federaciji Bosne i Hercegovine do danas nije usvojen, da je u članu 25. stav (1) Uredbe o vršenju ovlaštenja u privrednim društvima sa učešćem državnog kapitala iz nadležnosti Federacije

Bosne i Hercegovine ("Službene novine Federacije BiH", br. 20/16, 3/17, 9/17, 69/17, 96/17 i 101/22) definisano da se ista primjenjuje do donošenja Zakona o upravljanju državnim kapitalom u privrednim društvima u Federaciji Bosne i Hercegovine, Ured za zakonodavstvo Vlade Kantona Sarajevo podržava napore nosioca pripreme predmetnog materijala da predmetnu oblast uređuje kantonalnim zakonom, a kojim će se zaštititi interesi kantona u ovoj oblasti.

2. Odredbama čl. 2. do 17. dostavljenog nacrtu Zakona o upravljanju privrednim društvima u kojima je Kanton Sarajevo član društva (u daljem tekstu: Zakon) uređena su pitanja vršenja ovlaštenja u privrednim društvima u kojima je Kanton Sarajevo član društva, koji Vlada Kantona Sarajevo ostvaruje putem punomoćnika, značenje izraza, pitanje evidencije privrednih društava, te imenovanje punomoćnika u društvu sa ograničenom odgovornošću, uslovi za njegovo imenovanje, upute za postupanje navedenog punomoćnika, njegovo razrješenje, punomoć i upute za postupanje punomoćnika u dioničkom društvu, praćenje rada punomoćnika, pobijanje valjanosti punomoći i naknada za rad punomoćnika, a koje sadrže stručna pitanja koja su u nadležnosti nosioca pripreme predmetnog materijala.

Predlagač Odluke o vršenju ovlaštenja u privrednim društvima sa učešćem državnog kapitala iz nadležnosti Kantona Sarajevo („Službene novine Kantona Sarajevo“, broj: 31/19), Sarajevo, a koja prestaje da važi u članu 19. nacrtu Zakona, bilo je Ministarstvo komunalne privrede i infrastrukture Kantona Sarajevo.

Nacrt Zakona može poslužiti kao polazna osnova za pripremu prijedloga ovog propisa.

3. Dostavljeni materijal je pripremljen u skladu sa Uredbom o postupku i načinu pripremanja, izrade i dostavljanja propisa ("Službene novine Kantona Sarajevo", broj: 50/17- Drugi novi prečišćeni tekst, 2/18- Ispravka i 32/22), te se isti može razmatrati na jednoj od narednih sjednica Vlade Kantona Sarajevo.

Dostaviti:

- ① Naslovu
2. Evidencija
3. Arhiva





Broj: 03-04/1-02-2848/25
Sarajevo, 29.01.2025. godine

MINISTARSTVO PRIVREDE
gosp. Zlatko Mijatović, ministar

PREDMET: Nacrt Zakona o upravljanju privrednim društvima u kojima se kao član društva pojavljuje Kanton Sarajevo, mišljenje –

VEZA: Vaš akt, broj: 07-02-02-2583/25 od 27.01.2025. godine

Postupajući po Vašem aktu, broj i datum gornji, na osnovu odredbi člana 7. Zakona o ministarstvima i drugim organima uprave Kantona Sarajevo ("Službene novine Kantona Sarajevo", broj 40/22) i člana 4. stav 6. Uredbe o postupku i načinu pripremanja, izrade i dostavljanja propisa ("Službene novine Kantona Sarajevo", broj 50/17-Dруги нови преčišчени текст, 2/18-Ispravka i 32/22), Ministarstvo pravde i uprave razmotrilo je nacrt ovog zakona i daje sljedeće

MIŠLJENJE

Nacrt Zakona o upravljanju privrednim društvima u kojima se kao član društva pojavljuje Kanton Sarajevo je propis kojim se ne povrjeđuju prava zaštićena odredbama Evropske konvencije o zaštiti ljudskih prava i osnovnih sloboda, niti je u suprotnosti sa drugim pravnim aktima, kojima je utvrđena zaštita ljudskih prava i sloboda.

S poštovanjem,

Dostaviti:
1. Naslovu;
2. a/a.





Bosnia and Herzegovina
Federation of Bosnia and Herzegovina

CANTON SARAJEVO
Ministry of Finance

Broj: 08/03-02-2837/25 NB
Sarajevo, 28.01.2025. godine

MINISTARSTVO PRIVREDE
KANTON SARAJEVO

Predmet: Mišljenje na Nacrt zakona o upravljanju privrednim društvima u kojima se kao član društva pojavljuje Kanton Sarajevo

Veza: Vaš dopis br. 07-02-02-2583/25 od 27.01.2024. godine

Vezano za vaš zahtjev za mišljenje na Nacrt zakona o upravljanju privrednim društvima u kojima se kao član društva pojavljuje Kanton Sarajevo, u skladu sa članom 8. Pravilnika o proceduri za izradu izjave o fiskalnoj procjeni zakona, drugih propisa i akata planiranja na budžet („Službene novine Federacije BiH“, br. 34/16 i 15/18), dajemo sljedeće mišljenje:

Ministarstvo privrede je postupilo u skladu sa navedenim Pravilnikom i Ministarstvu finansija uz Nacrt zakona dostavili na mišljenje popunjen i potpisan obrazac IFP-NE u kojem je data sljedeća izjava: „Za primjenu ovog akta nisu potrebna dodatna budžetska sredstva“.

Obzirom da do današnjeg dana (28.01.2025. godine) nije donesen Budžet Kantona Sarajevo za 2025. godinu i na snazi je Odluka o privremenom finansiranju potreba Kantona Sarajevo za period 01.01.-31.03.2025. godine, u skladu sa Zakonom o budžetima u FBiH („Službene novine FBiH“, br: 102/13, 9/14, 13/14, 8/15, 91/15, 102/15, 104/16, 5/18, 11/19, 99/19 i 25/22) i navedenom Odlukom konstatujemo sljedeće: Privremeno finansiranje obavlja se srazmjerno sredstvima utrošenim u istom periodu, a najviše do tromjesečnog prosjeka za prethodnu fiskalnu godinu. U periodu privremenog finansiranja finansiraju se isti programi a budžetski korisnici ne mogu započeti nove ili proširene programe i aktivnosti dok se ne donese budžet.

Dostaviti:

- ① Naslovu
2. MF – Sektor za budžet i fiskalni sistem
3. a/a

Pripremio: Nedžad Bašić, dipl.ecc
Kontrolisala: Amina Močević, mr.



MINISTAR

Dr. Afan Kalamujić



Broj: M-16/2025
Sarajevo, 17.02.2025. godine

Bosna i Hercegovina
Federacija Bosne i Hercegovine
KANTON SARAJEVO
Ministarstvo privrede

Veza: Akt Ministarstva privrede br: 07-02-02-2583/25 od 27.01.2025. godine

Aktom broj i datum veze, koji je zaprimljen od strane ovoga Pravobranilaštva dana 28.01.2025. godine, zatražili ste mišljenje ovog organa u postupku donošenja „Zakona o upravljanju privrednim društvima u kojima se kao član društva pojavljuje Kanton Sarajevo“ (u daljem tekstu: Zakon) sve u skladu sa Uredbom o postupku i načinu pripremanja, izrade i dostavljanja propisa („Sl. novine Kantona Sarajevo“, br. 50/2017 i 2/2018).

Postupajući u skladu sa odredbama člana 14. Zakona o pravobranilaštvu („Sl. novine Kantona Sarajevo“ br. 33/2008, 7/2012, 44/2016 i 45/2021), a u vezi sa članom 3. stav 5. Uredbe o postupku i načinu pripremanja, izrade i dostavljanja propisa („Sl. novine Kantona Sarajevo“, br. 50/2017 i 2/2018), ovaj organ je izvršilo uvid u dostavljeni nacrt Zakona, te isti dalje sljedeće:

MIŠLENJE

Uvidom u dostavljeni nacrt Zakona utvrđeno je da se odredbama dostavljenog nacrta Zakona ne uređuju imovinsko-pravni odnosi, prava i obaveze prema stvarima i vlasništvu Kantona.

S tim u vezi, ovaj organ nema primjedbi na dostavljeni nacrt „Zakona o upravljanju privrednim društvima u kojima se kao član društva pojavljuje Kanton Sarajevo“.

S poštovanjem,


ZAMJENIK PRAVOBRANIIOCA
Elmir Bajrić

Član 2.

Vlada Kantona je izvršna vlast Kantona Sarajevo (u daljem tekstu: Kanton), u skladu sa Ustavom.

Član 3.

Vlada Kantona vrši svoja prava i dužnosti na osnovu i u okviru Ustava i ovog zakona.

Član 4.

Sjedište Vlade Kantona je u Sarajevu.

Član 5.

Vlada Kantona donosi poslovnik o radu kojim se uređuje: organizacija i način rada, postupak i način zakazivanja sjednice; dostavljanje i forma materijala za razmatranje, utvrđivanje prijedloga zaključaka i drugih akata; postupak razmatranja materijala; način ravnopravne upotrebe jezika i pisma konstitutivnih naroda u pripremi i izradi pisanih materijala; način izvršavanja zaključaka; prenošenje ovlaštenja i druga poslovnička pitanja.

Član 6.

Vlada Kantona raspolaze imovinom u vlasništvu Kantona u okviru ovlaštenja koja joj Skupština Kantona prenese posebnim propisom.

II - SASTAV I ORGANIZACIJA VLADE KANTONA

Član 7.

Vladu Kantona čine premijer Kantona (u daljem tekstu: premijer) i 12 ministara.

Član 8.

U slučaju privremene spriječenosti premijera, funkciju premijera vrši član Vlade kojeg odredi premijer.

U slučaju privremene spriječenosti premijera duže od 30 dana, funkciju premijera vrši član Vlade kojeg odredi predsjedavajući Skupštine Kantona, u konsultaciji sa zamjenicima predsjedavajućeg Skupštine Kantona.

U slučaju da mjesto premijera ostane upražnjeno, kandidat za premijera se imenuje u roku od 30 dana od dana kada je mjesto premijera ostalo upražnjeno, na način utvrđen ustavom, do kada funkciju premijera obavlja član Vlade Kantona kojeg odredi predsjedavajući Skupštine Kantona, u konsultaciji sa zamjenicima predsjedavajućeg Skupštine Kantona.

S danom imenovanja kandidata za premijera smatra se da su dosadašnji članovi Vlade u ostavci, koja stupa na snagu danom potvrđivanja imenovanja Vlade u novom sazivu.

Do potvrđivanja imenovanja Vlade u novom sazivu dosadašnji članovi Vlade nastavljaju s obavljanjem funkcije članova Vlade i ministara ministarstava.

Potvrđivanje Vlade u novom sazivu obaviti će se u roku od 30 dana od dana imenovanja kandidata za premijera.

Član 9.

U slučaju privremene spriječenosti člana Vlade, kada se razmatraju materijali iz nadležnosti ministarstva kojim rukovodi odsutni član Vlade, sjednicama Vlade prisustvuje sekretar tog ministarstva, bez prava glasa.

U slučaju privremene spriječenosti člana Vlade duže od 30 dana, funkciju ministra ministarstva kojim rukovodi odsutni ministar vrši član Vlade kojeg odredi premijer.

U slučaju da mjesto člana Vlade ostane upražnjeno, član Vlade se imenuje u roku od 30 dana od dana kada je mjesto člana Vlade ostalo upražnjeno, na način utvrđen ustavom, do kada funkciju ministra ministarstva kojim je rukovodio dotadašnji ministar obavlja član Vlade kojeg odredi premijer.

Ministar iz st. 2. i 3. ovog člana kojeg odredi premijer, ne obavlja i funkciju člana Vlade umjesto odsutnog ministra.

Član 10.

U slučaju kad Skupština izglasa nepovjerenje Vladi, premijer i članovi Vlade podnose pismenu ostavku, najkasnije u roku od

**Zakonodavno-pravna komisija
Skupštine Kantona Sarajevo**

Na osnovu člana 8. Zakona o izmjenama i dopunama Zakona o Vladi Kantona Sarajevo ("Službene novine Kantona Sarajevo", broj 38/13) i člana 181. stav 1. Poslovnika Skupštine Kantona Sarajevo ("Službene novine Kantona Sarajevo", broj 41/12 - Drugi novi prečišćeni tekst i br. 15/13 i 47/13), Zakonodavno-pravna komisija Skupštine Kantona Sarajevo, na sjednici 22.08.2014. godine, utvrdila je Novi prečišćeni tekst Zakona o Vladi Kantona Sarajevo.

Prečišćeni tekst Zakona o Vladi Kantona Sarajevo obuhvata: Zakon o Vladi Kantona Sarajevo ("Službene novine Kantona Sarajevo" broj 24/03-Prečišćeni tekst) i Zakon o izmjenama i dopunama Zakona o Vladi Kantona Sarajevo ("Službene novine Kantona Sarajevo", broj 38/13), u kojim je naznačen dan stupanja na snagu tih zakona.

Broj 01-05-22971-1/14
22. augusta 2014. godine
Sarajevo

Po ovlaštenju
Esad Hrvaić, s. r.

ZAKON**O VLADI KANTONA SARAJEVO**

(Novi prečišćeni tekst)

I - OPĆE ODREDBE

Član 1.

Ovim zakonom uređuje se sastav i organizacija, kao i druga pitanja od značaja za rad Vlade Kantona Sarajevo (u daljem tekstu: Vlada Kantona).

VII - AKTA VLADE KANTONA

Član 26.

Vlada Kantona u ostvarivanju svojih nadležnosti utvrđenih ustavom donosi uredbе, odluke, rješenja i zaključke.

Član 27.

Izuzetno za vrijeme trajanja ratnog stanja ili neposredne ratne opasnosti kada postoji objektivna nemogućnost da se sazove Skupština Kantona, Vlada može donositi i propise iz nadležnosti Skupštine Kantona.

Propisima iz stava 1. ovog člana ne mogu se staviti van snage prava i slobode utvrđene ustavom i drugim propisima.

Propise iz stava 1. ovog člana Vlada će dostaviti Skupštini na potvrdu čim ona bude u mogućnosti da se sastane.

Član 28.

Uredbom se uređuju najvažnija pitanja iz nadležnosti Vlade Kantona, bliže uređuju odnosi za provođenje zakona, obrazuju stručne i druge službe Vlade Kantona i utvrđuju načela za unutrašnju organizaciju organa uprave Kantona.

Odlukom se uređuju pojedina pitanja ili propisuju mjere Vlade Kantona, daje saglasnost ili potvrđuju akta drugih organa ili organizacija i odlučuje o drugim pitanjima o kojima se ne odlučuje uredbom.

Rješenjem se odlučuje o imenovanjima i razrješenjima, kao i o drugim pojedinačnim pitanjima iz nadležnosti Vlade Kantona.

Zaključkom se utvrđuju stavovi o pitanjima od značaja za provođenje utvrđene politike, uređuju unutrašnji odnosi u Vladi Kantona i određuju zadaci organima uprave i službama, kao i radnim tijelima Vlade Kantona. Zaključkom se odlučuje i u drugim slučajevima u kojima se ne donose druga akta.

Član 29.

Uredbe i odluke Vlade Kantona objavljuju se u "Službenim novinama Kantona Sarajevo", a ostali akti Vlade ako je to u njima navedeno.

VIII - JAVNOST RADA VLADE KANTONA

Član 30.

Javnost rada Vlade Kantona obezbjeđuje se u skladu sa zakonom kojim se reguliše sloboda pristupa informacijama u Federaciji Bosne i Hercegovine.

IX - STRUČNE I DRUGE SLUŽBE KANTONA

Član 31.

Za obavljanje stručnih i drugih poslova za potrebe Skupštine Kantona, Vlade Kantona i organe uprave, Vlada Kantona može osnivati određene stručne, tehničke i druge službe, kao zajedničke ili samostalne službe, u skladu sa zakonom.

Aktom o obrazovanju službe iz prethodnog stava, utvrđuje se njen djelokrug, kao i status i odgovornost te službe i lica koje njom rukovodi.

Član 32.

Vlada Kantona vrši nadzor nad radom stručnih službi koje obrazuje.

Sekretar Vlade Kantona rukovodi radom Stručne službe koja obavlja poslove za potrebe Vlade Kantona i odgovoran je za njen rad.

X - PRELAZNE I ZAVRŠNE ODREDBE

Član 33.

Vlada Kantona je dužna donijeti Poslovnik o svom radu u roku od 30 dana od svog konstituisanja.

Član 34.

Vlada Kantona Sarajevo dužna je uskladiti Poslovnik o radu sa odredbama Zakona o izmjenama i dopunama Zakona o Vladi Kantona Sarajevo ("Službene novine Kantona Sarajevo", broj 38/13), u roku od 30 dana od dana njegovog stupanja na snagu.

Član 35.

Poslovnik Izvršnog odbora Grada Sarajeva i drugi propisi koji se odnose na njegovo unutrašnje organizovanje i funkcionisanje, koji su na snazi na dan stupanja na snagu Zakona o Vladi Kantona Sarajevo ("Službene novine Kantona Sarajevo", broj 7/96), ukoliko nisu u suprotnosti sa Ustavom Kantona i ovim zakonom, primjenjivaće se kao propisi Vlade, dok se ne donese Poslovnik o radu Vlade Kantona.

Član 36.

Do imenovanja premijera i članova Vlade u skladu sa Zakonom o izmjenama i dopunama Zakona o Vladi Kantona Sarajevo ("Službene novine Kantona Sarajevo", broj 4/01), poslove iz nadležnosti Vlade vršit će Vlada u dosadašnjem sastavu.

Član 37.

Ovlašćuje se Zakonodavno-pravna komisija Skupštine Kantona Sarajevo da utvrdi Novi prečišćeni tekst Zakona o Vladi Kantona Sarajevo.

Član 38.

Zakon o izmjenama i dopunama Zakona o Vladi Kantona Sarajevo stupio je na snagu osmog dana od dana objavljivanja u "Službenim novinama Kantona Sarajevo", broj 38/13.